

四庫全書

集部

欽定四庫全書

楊仲弘集卷五

元 楊載 撰

次韻虞彥高遊陽明洞

憶昔神禹奠九州茲山會計功始休諸侯玉帛渺何許
但見萬水從東流衣冠永閉陽明洞夜聞鬼哭巖之幽
珠宮貝闕號龍瑞天造地設非人謀槎牙怪樹凍不死
化作千丈蒼玉虬丹洞呀然仙掌裂翠峰巧矣蛾眉修
梅梁飛去鐵鎖斷往往雷雨生靈湫軒轅緹神極祕怪

海上笙鶴時相投平生閉門讀史謳子乃探穴先吾游
明當挾子騎汗漫題詩更在最上頭不妨山水樂吾樂
豈有飢溺憂民憂故家喬木尚可求有子有孫百世留
卧橫玉簫泛歸舟吹散萬斛江南愁

送俞用中之蓮城

君家文獻猶未泯名載舟車無不之乃翁種德不食報
流慶涓涓方在茲皦然玉立七尺軀相非公卿無此奇
早孤為學孰勉劬藏書萬卷能盡披季父撫育過已子

將為前人護址基我兄長公有年歲才氣偉煜通時宜
賈誼晁錯奉大對生晚弗及同驅馳君令沿檄治鄉校
初官履厯固不卑要為國中養賢俊政無大小視所施
括蒼山好著仙籍昔人於此自燕頤榮公相業輩王謝
石僧尚有踪跡遺君居三載業可想再見惟有操降旗

古牆行

建炎白馬南渡時循王以身佩安危疏恩治第壯與衛
縮板栽榦繇偏裨下鉅江城但沙鹵往夷赤山取焦土

帳前親兵力如虎一日連雲興百堵引錐試之鐵石堅
長城在此勢屹然上功幕府分金錢謹聲如雷動地傳
爾來瞬息逾百年高崖為谷驚推遷華堂寂寞散文礎
喬木慘淡棲寒烟我入荒園訪遺古所見惟存丈尋許
廢壞終嗟麋鹿游飄零不記商羊舞王孫欲言淚如雨
為言王孫母自苦子孫再世隳門戶英公尚及觀房杜
如君百不一二數人生富貴當自取況有長才文甚武
公侯之後必復初好把家聲繼其祖

題山石猿鳥圖

萬卷堆中昏欲睡忽見畫圖醒我意眼前崖谷起嵯峨
便似著身遊此地梗枿櫛櫟大百圍奔泉透石辟歷飛
玄猿孤峙憩美蔭下視白鳥娛清暉昔聞虞舜狩南嶽
君子相隨化猿鶴往時此輩猶爾為慨想雲林真可樂
拔劍斫山山骨露山鬼咿嚶安敢怒祇今踊躍歸去來
莫愁無覓誅茅處

李伯時畫浴馬圖

古稱難畫莫如馬近朝唯數李伯時不至天閑觀帝服
如此骨相何由知頭類渴烏尖插耳竟度流沙輕萬里
圉人牽浴恒凜然復恐化龍奔入水貧居里巷無馬騎
徒步出入多傷悲大脰薄蹄何足願退立道傍塵滿面

送時中兄入京

先生意氣非常流有如鵬鷃厲九秋讀書不肯守章句
經濟可許斯人儔懷抱利器將遠遊直往上國交公侯
王侯位高不下士如以蛟龍視螻蟻為君莫敏光範書

以氣撼搖差可耳功名倘來不足為丈夫須作遠大期
君不見麒麟閣上圖英俊當時或自閭閻

有闕文

次韻題慈照寺浪紋石

山前流水響急灘崖崿齟齬且艱直上正平稍去水
坡陁漫漫龍背起幽阻之間有奇石沟若北風吹海立
滄海飛塵事有徵遂使喧阗化冥寂開闢以來六萬四
千歲浩浩洋洋不休息雖有好事者欲為之不似大造
無痕迹我行見之頗愕然抽觴戲欲取涓滴僧堂託宿

語不眠竟莫禮了生公禪意外奇崛當眼前跋涉無負
兩足趼君家住時宅通鄺何如金堂石室友羣仙曾見
石髓流為泉何事更種東臯田子能食之可長年

題王起宗畫松岩圖

雲起重岩鬱凌亂長松落落樹直榦若人於此結茅屋
爽氣飄然拂霄漢艤舟之子何逍遙從者偃僂攜一瓢
山中無日不閒暇跋涉相顧凌風颭始知王宰用意高
使人觀圖鄙吝消世間未必有此景塗抹變幻憑秋毫

丹青遊戲故足樂收絕視聽搜冥冥向來為政殊不惡
乃爾胸中有丘壑

題華岳江城圖

華岳能詩世有名學畫丹青亦豪放此圖似寫安慶城
雉堞樓臺儼相向北風將至江面黑千艘萬艘爭避匿
滄溟涌溢水倒流南嶽動搖天柱側蛟龍戲落秋潭底
素練平鋪八千里時清好作釣魚翁閑弄輕舟烟霧裏
神馬歌次韻陳元之

神馬來自崑崙西有足未始行沙泥朝趨欲出飛鳥上
夕逝直與奔星齊綠鬃半散插雙耳赤汗交流攢四蹄
風神秀溢陬天地豈顧燕蔡并渠黎時時牽浴臨清溪
對人誇殺黃須奚玉沙之未中芻秣不啗堤頭枯草稊
與君側耳聽長嘶凡馬不聞生駉騏

古劍歌為吳真人作

閒閒真人藏古劍敬之如神不敢忽賓客時來求一觀
輒有悲風起倉卒人言此是金鐵精良工煅煉久始成

動搖天地合變化摩蕩日月含光精昔年有蛟起江中
口吐烈焰燒長空下民昏溺上帝怒雷電往擊皆無功
嘗持此劍斬蛟首流血滔滔浸廬阜傳記傳聞時既久
不意世間今尚有吾過下里多惡氛魍魎魅能食人
請君為我絕此怪一洗宇宙長清新

梅梁歌酬鄭集之

大禹之功及天地廟有梅梁何足異奈何過用鐵索纏
太祝為之欲徼利每言變化失其所去作老龍治風雨

一聲霹靂震岩扉千尺蜿蜒辭殿戶七月槁苗沾塊土
憂殺村中老農父買羊沽酒祭梅梁祭罷祠官傳好語
吁嗟老農無爾愚大禹有神焉可誣汝曹淫祀欲求福
此物為妖當伏誅

題趙千里山水扇面歌

公子丹青藝絕倫喜畫江山上紈扇祇今好事購千金
四幅相連成一卷春流漠漠如江湖飛烟著樹相有無
嵐光注射翻長虛白玉盤侵青珊瑚追隨流俗轉蕭疎

對此便欲山林居
旗亭花發酒須沽
舟行為致雙提壺
抱琴之子來相須
醉歸不省何人扶
旁有飛泉出岩隙
掣電飛霜相盪激
蛟龍不愛鯢桓食
但見垂綸古盤石
人生萬事無根柢
出處行藏須早計
一丘一壑倘如斯
便可束書從此逝
君不見鄭子真躬耕谷口垂千春
毫芒世利能沒身
汝胡齷齪為庸人

題秋雨長吟圖

雨暗秋天黑如墨
窮居茅屋出不得
終日長吟復短吟

吟罷令人轉悽惻
飢猿抱樹屈雙肘
病鶴拖泥垂兩翼
何當策杖過溪頭
要看南山新翠色


竹樹圖

荊棘蒙籠迷竹樹
亂堆古石蒼苔護
縱獵青郊懷舊路
躍馬重岡追狡兔
箭翎落地無尋處

時中兄示余畫一軸
畫一老翁推獨輪
小車上載兩巨甕
意其為磬世之為
因為賦詩

小人無他獨嗜利
兩甕載車將遠致
肩頰足趼汗潛然

冉冉脩程胡不畏世人但笑愚翁愚甕破即與瓦礫俱
不知人有千金軀前行險道方乘車



楊仲弘集卷五

欽定四庫全書

集部

楊仲弘集卷八至

詳校官庶吉士臣初喬齡

侍讀臣孫球覆勘

覆校官中書臣方大川

校對官中書臣吳句華

謄錄監生臣沈浩

欽定四庫全書

楊仲弘集卷六

元 楊載 撰

宗陽宮望月分韻得聲字

老君臺上涼如水坐看冰輪轉二更大地山河微有影
九天風露寂無聲蛟龍竝起承金榜鸞鳳雙飛載玉笙
不信弱流三萬里此身今夕到蓬瀛

次韻錢唐懷古四首

江湖清濁自天開鴻鴈鳬鷺與往來黃道星辰環太乙

紫雲宮殿擁蓬萊論文競奏王褒頌獻壽深傾阿母盃
九域輿圖今混一百年耆舊獨興哀

又

斜界鈎陳通大道中分魏闕對層巒雲生殿上金爐暗
露下庭前玉井寒江漢飛龍俄宵宵滄溟泛鷁竟漫漫
中天會合寧非數坐見蒼生奠枕安

又

山回禁禦入雲長無復陳兵衛兩廂千石金鐘埋野草

萬年珠樹落秋霜
龍文不徙陽人聚
鳥篆終降輶道傍
九市塵埃來袞袞
一江波浪去茫茫

又

化人宮闕被層阿
棟宇高低若湧波
翠石文章書日月
寶珠光燄燭山河
空桑說法黃龍聽
貝葉繙經白馬駝
誰謂一無超衆有
只今塵土重來過

題豐樂樓

崢嶸飛構壓名邦
西望平湖東望江
氣合重玄蒙沆瀣

標存九域奠洪龐朝來散霧縈朱栱夜後流星透碧窓
倚徧闌干愁目眩飛鳶旋轉故雙雙

水樂洞

石林求路轉聲牙來訪香嚴大士家雨過門前生薤葉
風行隴上落松花懸崖滴水鳴金磬激澗流泉走玉砂
欲適山林去城市久知寂寞勝紛華

題拱北樓

殷地鼓鼙迎日出倚天梁棟與雲浮北瞻帝闕三千里

南控臣藩三百州江海無波沉罔象旌旗垂野駐貔貅
驚迴麗榜多深意繡衮于今有魏牟

次韻羅雲叔紅梅

玉人中酒殢芳華盡壓東風百種花
襖被冬深裁異錦
篝燈夜永障輕紗
纖蕤露沁蜂腰蠟
密蕊雲蒸鶴頂砂
為問閭風何處在
相期高舉籥晨霞

紀夢

海上垂綸有幾年
平居何事夢朝天
蒼龍觀闕東風裏

黃道星辰北斗邊治世祇今逢五百前程如此隔三千
揚雄解奏甘泉賦應有聲名達帝前

次韻陳子仁黃河二首

禹功疏鑿過憂勤海內山川自此分元氣渾淪通地脉
孤光迢遞貫天文母金伏礫秋逾盛陰火藏淵夜不焚
多少魚龍爭變化總歸西北會風雲

又

陰陽為殄黃河溢北度艱難擁萬艘齊楚百城防雉堞

淮沂千里避鴻濤耕鋤已失天時正流徙爭依地勢高
此日朝廷憂水患須明利害策賢豪

遊水樂洞分韻得人字

常聞勝地宅仙人如此淵泉必有神子晉重來玄鶴舞
琴高初化赤魚馴巖排利劍鉤鐔古水象鳴球節奏均
更有山僧能解語自今休厭往來頻

望海

海門東望浩漫漫風颺無時縱惡湍黑霧漲天陰氣盛

滄波銜日曉光寒豈無方士求靈藥亦有幽人把釣竿
搖蕩星槎如可馭別離塵土亦何難

送羅雲叔歸山中

黃石山原風物幽賤子往年曾一遊舊行櫬柘已成逕
新藝禾麻應滿疇馮衍能忘白首嘆謝安須為蒼生憂
餘杭溪上明日發愁殺楊花吹客舟

送段時敏之京

懷山挾海奠京師氣執紆餘盡北陸鴈度塞雲秋色遠

鵲鳴宮樹曉光遲
四方英俊皆來萃
一代經綸屬有為
君有長才希屈賈
好將詞賦重當時

留別京師

囊衣託載道傍車
人事匆匆歲欲徂
風雨四更雞亂叫
關河千里鴈相呼
蕪菁散漫根猶美
桑柘蕭條葉漸枯
卻向高丘重回首
五雲繚繞帝王都

東澗東萬戶蕭伯善

擇帥中軍自古難
獨分符節守藩翰
夜鳴鼓角溪山靜

曉豎旌旗雨雪乾不待掃門知魏勃豈須彈鋏識馮驩
祇令四海無征戰萬卷詩書好厭觀

送勾曲外史張君歸華陽

送君高舉入華陽古洞深蟠石路荒蔽日旌幢朝旋旋
飛空環佩夜琅琅餐霞已試登仙訣祀竈還修却老方
見說陶公雖隱遁猶將道德佐齊梁

送戶部康里尚書

二首

經濟才高負重名早趨蘭省執權衡唐除宰相同三品

漢拜司農列九卿禮樂正圖興美化錐刀先務已苛征
公家事業齊周召重使斯民望太平

又

屢挾囊書上國遊途窮獨擁弊貂裘驟蒙陸贄知韓愈
直待常何薦馬周北上塵埃憐寂寞南遊歲月苦淹留
鰥生資歷猶卑淺可使徘徊製錦不

贈同院諸公

詔編國史有程期正是諸郎儼直時虎士守門宮杳杳

雞人傳箭漏遲遲
窓間夜雨銷銀燭
城上春雲壓彩旗
才大各稱天下選
書成當繼古人為

玉堂夜直

直廬歲晏動羈情
朔雪將飛覺夜明
金井轆轤哀響絕
玉階瓊甃斷紋生
蘚花莫辨沿牆迹
松葉時聞委砌聲
愧以不才同制作
諸公此日負高名

惠山泉

此泉甘冽冠吳中
舉世咸稱煮茗功
路掛山腰開鹿苑

池攢石骨閔龍宮聲搖夜雨聞幽谷彩發朝霞眩太空
萬古長流那有盡探源疑與海相通

寄維揚賈侯

經國長才世豈多羣邪嫉正奈公何氣蒸雲霧藏喬獄
聲轉滄溟放大河遠跡江湖猶棄絕驚心歲月屢消磨
鷗鵬自有垂天翼肯逐飛鴻入網羅

寄康大夫

二首

往年持節使山南及此人情上下諳高士變心慚隱逸

小胥縮手戒貪婪猿聲散漫浮青嶂鴈影離裊曳碧潭
遙想政成多暇日幃帷出郭有誰叅

又

遙想幃帷出郭時先駟十里走旌旗青山落日蒼茫暗
白水秋風慘淡悲勁矢每隨前隊發清笳偏逐後行吹
荊州未覺風流遠縱飲還應到習池

寄康里公

二首

廟堂為政已優游第秉純誠贊大猷五緯連珠環北極

萬方同軌會中州衣冠肅肅趨金殿鐘鼓遲遲報玉樓
治世賢才今盛集願陳早麓頌宗周

又

歎息流年逐逝波功名到手莫蹉跎高才自昔遭逢少
公論於今責望多梁棟器充能負荷鹽梅味合要調和
共誰魯國勲庸盛青史何年可滅磨

寄康大夫

官居烏府號清嚴察吏由來首六廉舊直螭頭司紀載

新加豸角備觀瞻蒙恩聖主寧求進具禮名流每執謙
欲論六朝興廢事簞輿應度蔣山尖

送伯長扈駕

二首

罕畢前驅盛國容黃麾仙仗衛重重星流曠野飛蒼鶻
日麗層霄馭赤龍耀武邊陲須北狩合祛天地待東封
論才孰可銘休烈扈聖還宜祀岱宗

又

追從羣彥客金門獨用才高被國恩石室紬書裁帝紀

玉堂草詔代王言宦途赫赫名方振餘子紛紛氣可吞
會合適逢千載運奮飛寧羨北溟鯤

寄袁伯長

幾年簪筆侍明光直取才華補衛郎祀事悉稽周典禮
頌聲須假漢文章雲垂迥野鳴鞘遠月滿高城下漏長
校獵合祛尤盛事願聞作賦擬長楊

東湖四景為大尹本齋王侯賦

四首

朝來千騎出城闌為向東湖踏早春素練幕林雲氣薄

明珠穿草露華新山花獻笑開簷畔海鳥忘機戲水濱
記取當年賢太守及時為樂與斯民

又

夏月湖中爽氣多南風疊疊捲長波漁人舟楫衝蘋藻
遊女衣裳擘芰荷膾切銀絲嘗美味腔傳金縷換新歌
史君用意仍深遠即此光華豈減磨

又

整停麾蓋擁輕舟此日湖山屬暮秋采采黃花登几案

離離紅樹散汀洲
傾壺浮蟻杯頻竭
下箸鮮鱗網乍收
莫向錢唐誇往事
白蘇未許擅風流

又

雲氣低藏十萬家
東湖飛雪又交加
玉禾舊布仙山種
瓊樹新開帝所花
別浦移舟聞過鴈
高樓凭檻見歸鴉
侯門似有相如客
賸賦篇章與世誇

虞待制魏錄事述懷有作次韻奉和二首二公皆
故相之後 二首

勢等衡廬各柱天家傳性理竝鈎玄諫垣廟切章連上
文館招延席屢前羊豕尚修松下祭麒麟肯信草間眠
岷峨舊日求遺族萬里須乘逆水船

又

理氣兼明善論天祗應為易又為玄玩辭已契忘言表
說卦仍觀未畫前對案窮年無近效閉門長夏且高眠
却忘京國多奇士欲向長河共買船

即事

禁城曉色清如水，高下樓臺錦繡中。
千樹好花連上苑，百壺美酒出深宮。
珍禽競集高林霧，寶馬爭嘶橫岸風。
人物此時俱盛極，兩都絕勝漢西東。

次韻伯長待制

揮鞭遠過御溝斜，出院時時見暮鴉。
已入玉堂同視草，還趨瓊砌共觀花。
獸爐香繞窓前霧，蠟炬光搖帳底霞。
此去天津元不隔，何須八月泛靈槎。

送薛玄卿歸龍虎山

金門詔下羽人歸欲向山中採
薺薇琥珀懸崖松樹老琅玕倚澗竹根稀
高巖蓄雨星辰濕古石懸雲逕路微
養性可無軒冕累遊塵元不浣仙衣

送虞貞白之辰陽

君以調官來上國藹然聲譽動儒林
出門遇雨泥塗滑歸路逢霜歲月深
楚國千年歌白雪揚州三品貢黃金
高才不仕朝廷上有詔應煩使者尋

春雨

濛濛春雨暗重城
莽若山林雲氣生
駕過東朝霑羽蓋
仗移前殿濕霓旌
蒼松密掩巖頭鶴
翠柳深藏谷口鶯
明日不愁花爛漫
新晴陌上有人行

徐獨清挽詩

大道無名識者稀
獨于元始探精微
秦關忽報青牛度
遼海寧聞白鶴歸
經秘玉函旋地軸
書懸金榜闢天扉
門人攬拾編遺事
第錄先生杜德機

寄武當山人張真人

山走西南氣勢尊天神遺迹至今存冰橫磧下千年凍
雲起巖前萬里昏既有嚴威彰赫赫詎無厚福護元元
真人制行通天地日日飛仙降殿門

題火涉不花同知畫像

堂堂玉立照青春昭代由來重世臣帶納掖庭聯衛士
分符江徼總編民鷗鷺裘暖鳴鞭疾翡翠簾深翦燭頻
州縣三年姑少試驅馳休厭屬車塵

次韻田師孟西曹即事

隱吏重來右掖初
清明時節亂花舒
霧承黃閣霏霏重
雨散彤庭點點疎
李耳舊藏周典禮
蕭何元得漢圖書
經邦事業須公等
要使皇文日粲如

次韻黃子久獄中見贈

解組歸來學種園
栖遲聊復守衡門
徒憐郢塢開金穴
欲效寒溪注石尊
世故無涯方擾擾
人生如夢竟昏昏
何時再會吳江上
共泛扁舟醉瓦盆

鷗波亭阻雨

坐聽高樹響颼颼風雨相兼卒未休氣雜昏明侵晝景
色交黃赤變河流潛移窟宅蛟龍怒固守林樊鸛鶴愁
水潦此時傷稼穡天人何事計仇讐

懷錢唐故人東應中父

幾年流滯客京師每憶江邊話別離落魄已甘心似鐵
蹉跎無奈鬢成絲草玄思苦無人問彈鋏歌長只自悲
滿目塞雲飛去盡倚筇獨立更多時

寄吏部張尚書

復喜清朝用大賢
玉音俄對廣庭宣
姚崇已託君臣契
李泌終操將相權
此日經綸須展布
他時簡冊要流傳
淵明有待公田米
可念江湖久棄捐

題謝疊山遺墨

二首

荆南失守見亡形
太歲徒聞忌丙丁
羸老扣心天藐藐
鬼神號哭夜冥冥
忠臣效死招烏合
烈婦捐生報雉經
辭氣凜然遺墨在
再三尋繹淚雙零

又

故宮愁見黍離離大厦元非一木支義士忠臣徒走死
寡妻弱子謾傷悲五經文字寧虛設一代人才頗中衰
慷慨殺身猶易事似公方可正民彝

題本齋王公畫像二首

天姿英粹異庸常早籥雲霄被寵光劍戟森嚴開武庫
珪璋特達薦明堂願承簪履趨門下竊候旌麾拜道傍
邪正此時真雜糅秦臺懸鏡亦煌煌

又

詩禮傳家德望隆一門三世拜三公
五營帶甲軍容盛九府流泉國賦充
房魏素懷尊主術龔黃先奏養民功
欲將惠澤量深淺楚浸洋洋與海通

寄題成都萬竹軒為李仲淵作

君家種竹蜀江傍高與蠶崖勢頡頏
已樹旌旗分部曲更鳴琴瑟應宮商
蛟龍併逐波濤化虎豹曾因霧雨藏
兄弟至今俱宦達未應開逕接求羊

送范德機

往歲從君直禁林相於道義最情深有愁併許詩頻和
已醉寧辭酒屢斟漏下秋宵何杳杳窓開晴晝自陰陰
當時話別雖匆遽祇使離憂攪客心

送鄭子謙倅蘭溪二首

主人情重賦驪駒戶外羣騶有所須將喜在場登薺麥
毋忘入澤取萑蒲風乾鳥雀當欄噪日下牛羊隔隴呼
昭代擇賢先治理服勤簡牘是良圖

又

青絲絡馬去翩翩正是春風二月天
樂作前行尤蔚壯書隨後乘併稠
填徵符此日須官次射策他時對
御筵玉府編摩求大手知君元有
筆如椽

贈彭萬里

素居鄉鄙繫瞻聽遠涉京都迂寵靈
掛席波濤秋淼淼據鞍星宿曉熒熒
肯如蛟劍終藏匣誰信牛刀始發硯
將相與人殊勢分祇應雙眼為君青

七月十九日大明殿早朝

王氣浮空御殿開金衣照日近臣來絲囊已進千秋錄
黼座還稱萬壽盃王子吹笙雙鳳下義娥攬轡六龍回
衢樽比日霑恩賜散作祥風遍九垓

酬賈郎中

挺生雄俊氣昂昂服事朝家被寵光鸚鵡盃中春正好
鳳凰池上日偏長新裁樂府傳宮體舊著朝衣帶御香
忠孝兩全人所羨只今慈母在高堂

雷江阻風寄池陽通守周南翁

繫舟江岸隱蒲蘆坐聽篙師制疾徐巨浪駕空龍出沒
猛風吹樹鳥譙呼詩題短札難頻寄酒滿長鉶已屢沽
輦道沙乾宜竝馬問君何日宦京都

送王仲儀歸婺源

學道山中歲月長中年已見髮蒼蒼為延簪笏開松逕
困蓄詩書蓋草堂季子不期爭富貴公孫莫厭舉賢良
告歸苦值兼旬雨幾度黃流撼石梁

體覆木綿價過樂平境中偶賦

蒼山百里路盤盤遙望連峰劍戟攢斷岸回風纏古木
高崖飛雨雜奔湍石田礪确收成薄巖屋崎嶇結構難
度地何如江以北提封百萬有餘寬

點義倉即事

南來受命佐為州喜遇豐年暫出遊過嶺崎嶇尋道路
上山礪确治田疇脩藤掛樹龍蛇走恠石攢溪雁鷺浮
賦役已寬詞訴簡素飡無補謾優悠

題楊指揮樂善堂

樂善名堂事可誇
兩全忠孝故侯家
弦匏入廟思無忝
分胄升壇聽不譁
窻下唱雞書未卷
門前立馬鼓猶撾
後人自爾蒙遺德
流漲春江詎有涯

次韻張秋泉真人碧桃

道院桃開一樹春
往來勾引看花人
揮毫欲賦巫山女
振佩疑逢洛浦神
翠萼臨風搖不定
珠蕤承露綴如新
煌煌更結千年實
凡木何由竊比倫

再次韻

一枝如玉照芳春幾度凭闌欲殢人翠被夜寒愁灑淚
珠簾月冷怕傷神劉郎陌上栽仍舊王母池邊賞又新
不是梨花飄雪樹望中清絕更無倫

江上

合流渾渾古則然中有物恠藏深淵鮫人賣鮪出水底
龍女結佩遊堤邊芙蓉覆波顏色好薜荔絡石根株懸
此行欲遂極幽險所聞廬阜多神仙

過安慶城下呈李惟肅判官

山川未到已知名前代英雄幾戰爭水受委輸開巨浸
地乘走集建孤城島夷筐篚來修貢楚俗魚鹽樂治生
四海晏然當此日斯民何幸際承平

寓長春道院春雨即事呈鄭尊師二首

南榮相距數尋間滿地春泥隔往還夜雨暗添籬脚水
曉雲濃掩樹頭山修篁夾徑宜增植細草侵堦莫謾刪
世慮紛然無止極敢求大藥駐衰顏

又

客遊無賴阻重陰院落蕭條徑術深數畝林塘觀不厭
一窓風雨坐相侵靈蚪尚有蟠泥跡老驥寧無越塊心
多謝西家賢太守相招樂飲費千金

題沈君湖山春曉圖詩卷

迤邐沙堤接畫橋東風楊柳暗長條鶯隨玉笛聲偏巧
馬受金羈氣益驕舞榭歌臺臨道路佛宮仙館入雲霄
西湖春色年年好底事詩翁歎寂寥

東程處士

故人不見十年餘鴻雁南來得素書
茶吐槍旗迷澗谷竹供編簡塞庭除
詎容煉藥燒金鼎有待橫經校石渠
江上繫舟將發去黃山回首重躊躇

贈合部遇宗師

遠俗超然百慮忘蒲團孤坐日偏長
高城靜數蓮花漏密室頻燒柏子香
古地神通周世外諸天雄猛侍階旁
雜華義諦無窮盡願見菩提發寶光

楊仲弘集卷六

欽定四庫全書

楊仲弘集卷七

元 楊載 撰

舟次池陽偕通守周南翁燕表姪陳和卿家席上
贈歌者

故人相見話綢繆三日江干繫客舟
高燕未闌明月上
艷歌初轉彩雲留
光搖崖蠟寧知夜
字寫邊鴻已報秋
底事尊前能盡醉
為伊肯展翠眉愁

簡松江汪知府

君為郡守屢豐年能使歡聲塞市廛泮水薦游聲甚美
釣金竝入聽無偏漁河夜集千家網煮海朝凝萬竈烟
賓客況聞才子盛詠歌宜屬後人傳

壽姚國公

可樂無如父母全既賢既貴又長年金壺賜出青雲上
玉佩朝辭白日邊楚木論春猶五百蟠桃稱壽必三千
似聞黃綺歸來後長向山中作地仙

武當山張真人

張公被髮下山來欲為神州救旱災感召上天垂雨露
指揮平地起風雷槁苗再發還堪刈枯木重榮不假栽
受詔即思歸舊隱瓊樓玉殿繞崔嵬

奉呈左司張元朴郎中

上相登庸求攸助明公秉德動觀聽旂常大法藏清廟
玉帛彌文薦外廷欲立高名垂宇宙須知雅量配江濱
鰕生論事非晁董盡力還堪備使令

贈惠山聖長老

道人卓錫向名山路絕巖頭未易攀海上潮來風浩浩
洞中雲出雨潺潺松栢直起參天碧苔蘚旁行匝地斑
藉甚後人蒙法施有如流水注蒼灣

寄曹雲西

羨君卜宅遠紛龐長把絲綸釣大江杭稻色枯雲慘慘
芰荷聲急雨淙淙消磨歲月書千卷傲睨乾坤酒一缸
甫里當年遺帙在交鋒那肯豎幡降

送師總管

使節南來寵渥新
漢家京尹擇能臣
金爐香暖迎丹詔
玉陛霜清謁紫宸
已用嚴威摧酷吏
更推仁政澤齊民
知公夙抱經綸志
多立功名繼古人

題景德寺雲谷老師宜月軒

月入中庭欲睡遲
況逢秋夜特相宜
十分陰魄凝中氣
五色祥光溢上規
影清金盃須滿汎
風生玉笛任橫吹
老禪心地元虛寂
更想高簷獨坐時

送趙伯常

君如寶玉不磨礱吐氣騰騰作白虹外戶將迎皆美士
前途推挽必名公鵷行不獲朝參共燕坐猶能獻酢同
我憶東歸心正切奮飛偏羨挾秋風

重陽日作

客中佳節罷登高獨坐悽然感二毛紫陌泥塗秋泊泊
黑山風雨夜嘈嘈幽人侈有觀魚樂壯士慚無汗馬勞
得喪古今都一律唯應痛飲讀離騷

贈善畫沈處士

繪畫時賢屢逼真謾於城市老間身孰知麋鹿臺前客
解寫麒麟閣上人種樹十尋知閱世滋蘭百本喜逢春
詩成有愧丹青引獨使曹劉覓絕塵

送戴尊師入越

躍馬年年塞北遊春風此日送歸舟山中樹老飛玄鶴
江上莎長卧白鷗欲與謝公同隱逸肯容賀老獨風流
山陰道士如相見沽取村醪醉未休

簡李可度

從來憲府擢群英攬轡雍容按百城鵬鷃逢時方厲疾
豺狼避道敢縱橫每崇實政除民瘼肯假嚴威駭物情
君有美才當進用竚聞雅譽達神京

贈戴鑒

推測陰陽術已精研窮問難更通明山中說劍仍聞道
市上懸壺即治生蛇為銜珠知藥聖犬因舐鼎驗丹成
上鑒鑒國惟君可行載輶車入帝京

贈王止善

不見故人十年餘，況復往來音問疎。
倏然攜離事何限，即此歡會情如初。
不愁官卑少俸粟，第恐年長廢讀書。
隨羣逐隊祇可厭，秋風共釣長江魚。

次韻吳生見贈

早入儒林衣鵲袍，淋漓杯酒謾稱豪。
愁來客路烟沙遠，夢斷仙山雪浪高。
魯望浮家名獨著，君平賣卜志仍操。
和詩不足酬佳貺，孰謂瓊瑤報木桃。

贈雲上人

道人庭戶閤烟霞
誦習微文願力加
萬法莊嚴充世界
一音演說被河沙
窻光盡日搖松葉
履迹長年沒蘚花
邂逅有言還契合
緬思同會結龍華

卜畊宋徵士

古人命卜極精詳
苟得神龜必寶藏
分胃在天兼赤黑
圖書隨地列圓方
大而元氣求乖合
細則人為驗否臧
家食如君知此術
耕耘何事竟凶穰

送周用章

君行萬里赴京師凜凜風霜及此時第挾簡編辭白屋
遽承袍笏會丹墀宮花挿帽知恩重御酒霑唇覺醉遲
必有三篇侔賈傳上陳王道正民彝

送陳堯卿之京師

欲攜三策扣天閭萬里程途未易論彈鋏幾年依客舍
曳裾何處覓王門夜闌孤館聽殘漏春入長河辨舊痕
文采似君宜得意要津何患少攀援

登邵氏宜晚樓

曾入明光捧御筵歸來山澤伴儒仙驅馳已出紅塵表
締構還依碧嶂前豁達軒窓吞宇宙崑莧梁棟接雲烟
憑高眺望尤宜晚屏障橫開紫翠連

呈馬昂夫僉院

君為胄子入京都才望高華世所無祕殿為郎監玉篆
雄藩作守判銅符科條自可甦民瘼議論還宜贊聖謨
更倚覃懷功業盛栽栽天柱立坤隅

次韻錢翼之

有聲吳下頗多年長把漁竿釣海邊
李賀才名過杜牧
魯公書法繼張顛
塵沙撲面驚吾老
星宿蟠胸愧子賢
歲晚著書言道妙
青青林竹正宜編

賦飛鴻送胡則大

年年客裏見飛鴻
成陣成行上碧空
杳杳江湖尋故侶
蕭蕭蘆葦下新叢
翺翔已出雲霄上
飲啄寧來沼沚中
今日似君歸去好
扁舟一夜起東風

賜宴謝恩

恭承明詔策羣英欲為斯民致太平孔孟教人先禮樂
申韓操術尚刑名混同已正千年統恒久方觀萬物情
勿謂成周多吉士朝陽亦有鳳凰鳴

送劉長卿張伯起二公歸閩中

去來蹤跡固相違邂逅今朝共載歸欲效駟蛩俱北上
復誰鴻鵠向南飛乍離江上芙蓉幕還著山中薜荔衣
所羨二君才氣盛願聞玉屑吐霏霏

奉美劉侯

蘇白風流迹未賒賢侯相繼事堪誇
史書日覽三千牘
民版春登百萬家
遊寺已諳松下路
泛舟頻醉柳邊沙
要知為政多恩澤
看取庭前丹桂花

次韻蕭君用

崔嵬出水翠雲浮
舳舻拖舟豈厭遊
澶漫渠河方涉夏
蕭條竹樹已迎秋
銜杯興盡人先醉
舞劍歌長客易愁
八月江湖翻渤澥
長竿更約與君投

送殷國華之和州

送君行李欲何如
楚國蕭條戰伐餘
西塞人州連草莽
南江風浪入空虛
遺民少作先王服
故府徒存博士書
舊事到今多泯滅
好從黎老問從初

遣興

庭樹號蟬日已涼
塞雲橫鴈夜何長
挾書萬里干明主
仗劍三年別故鄉
西北諸山連朔漠
東南衆水隔荆揚
淹留不去慚蘇子
莫遣貂裘壓雪霜

湖上

秋郊縱步却驂驪勝事能多許客叅如雪萬家收早稻
未霜千樹著黃柑鶯鳴海上潮先湧猿叫山前霧欲含
放浪漁樵元有處使人猶愛住江南

贈沈子成

學琴年少已知名揮弄和柔指法精秋塞乍聞鴻鴈叫
朝陽還聽鳳凰鳴幽人隱几中情適壯士投戈宿憤平
此日有虞興至治南風一曲解同聲

偕汪侯宴舟中

中流畫鷁獨翱翔暫勒鳴騶駐岸傍風引錦帆衝野色
波隨蘭棹汎晴光草涵宿潤珠璣滑麥漲春雲餅餌香
何事乘槎之海上問津從此達天潢

偕鄭尊師飲余氏池亭

池亭翼翼午風涼隔岸田疇穡麥香碧水千尋鷗蕩漾
青天萬里鶴翱翔藏書不為傳孫子學道還宜應帝王
獨行似君何可得結交晚歲獲求羊

竹所為余隱君作

奇君負郭定幽居多植修篁數畝餘結實已期棲鳳鳥
垂綸仍欲釣鯨魚揭竿對戶思排戟截簡盈筐備寫書
清響繁陰皆可愛炎天飛雪滿庭除

贈月桂庭長老

婆婆影滿一輪中普照人間不計功金色光明涵世界
玉毫相好現虛空開時已與羣芳異出處難將衆木同
萬里青雲方得路遨遊願入廣寒宮

送王仲致舍人歸閩中

鳴騶擁道去翩翩欲詣閩中拜墓田伏虎為司樵牧禁
蟠螭著代鼎彝鑄上公復世儀文備胄子承家問學專
冢舍驟興循制度大書史冊必流傳

用左轄郝公詩韻寄曹雲西居士

姓名奕奕冠清流處世還同貉一丘干木道高寧仕魏
子房身退尚封留靜依杉竹營書室深入蕖荷理釣舟
乘興每思陪笑語揚帆萬頃泛清秋

送劉希孟赴曹雲西招

吳郡唯君善鼓琴，曾于律呂用情深。
和聲細潤鶯遷木，奏響清圓鶴在陰。
素習已能除俗調，靜聽真可禁邪心。
相知賴有曹居士，為產從茲過十金。

送葉顯仁任衢州錄

吾鄉文雅舊彬彬，再遇時清喜有人。
鳳沼已聞繇衆選，熊蹯無愧用賢賓。
橫經辯論超周列，奉檄光華及老親。
姑蔑到家三百里，告歸晨省莫辭頻。

暮春遊西湖北山

愁耳偏工著雨聲
好懷長恐負山行
未辭花事駸駸盛
正喜湖光淡淡晴
倦憇客猶勤訪寺
幽棲吾欲厭歸城
綠疇桑麥盤櫻筍
因憶離家恰歲更

題夏氏濟饑詩卷

木饑火旱際荒年
百姓流離狀可憐
往往富人心似鐵
累累餓殍口生烟
此時顆粒無沾丐
是歲鄉都少棄捐
天道神明如鑒在
宜令夏氏子孫賢

謝曹雲西菊

聽鶴亭西處士家中國萬本值秋華攜鉏歲歲根株茂
載酒時時興趣嘉已散白英凝曉露更敷紅艷照晨霞
新題料得篇章富肯示同遊細細誇

題沈氏東陽義塾

竝海蒼涼建學宮雲端百里現青紅東南多士題詩徧
西北諸儒坐席通求道每加操守力明經深著討論功
流傳後世光華盛事與南京戚氏同

謝曹雲西寄菊花

君種菊花兼五色能令秋日勝春時香浮璣筆和金屑
光射園林列錦帷遠水波寒凝慘淡嚴霜節屆厭離披
淵明去後踰千載猶有斯人把一枝

寄無錫倅劉雄飛張景亮二史君

閨閣俱高負美名共分符竹守江城帆檣密送遮天影
鐘鼓遙傳動地聲木落西山愁歲晏禾登南畝慶秋成
知君佐政多恩惠側耳邦人頌太平

次韻羅雲叔雪中見寄

目前坑塹已平填此日封姨復弄權略約未通溪上路
輾輻方陷漠南天寒侵兔窟愁山鬼凍合龍宮偏水仙
堪羨廣文才力壯詩成竝和轉清妍

贈張相師

縉紳往往識名流歲晏猶為汗漫遊自許唐生知蔡澤
欲干季布禮曹丘囊詩價重聯珠玉匣劍芒寒射斗牛
輦轂諸公爭致士江湖何事更淹留

次韻汪復心主簿

秋霜壓鬢似相陵喚父呼兄乍肯鷹厭采黃花延醉客
喜焚柏子待禪僧驟登臺閣期君可久困塵沙歎我曾
二子說聞俱好學鵬程萬里羨飛騰

送方天瑞釣臺山長

富春江上釣臺高傍築書堂處俊髦要為鄉閭施教化
更因山水暢風騷蘼鹽供養寧嫌薄朱墨研磨肯憚勞
至日菊花黃滿地淋漓觴酒任君操

高沙朱山甫挽詩

何勞閱市稅魚雞歸去山中樂舊棲瘦杖穿雲登峻嶺
小舟乘月泛清溪無僧扣竹茶仍煮有客尋花酒亦攜
江海風流今已矣孤墳愁見草萋萋

送高子盤初菴山長

文行繇來著本根芳菲何異殖蘭蓀諸公藉藉多相許
凡子區區不足論書館已能更士習翰林併可代王言
明年復應求賢詔必掇高科奉帝軒

題張氏順堂

厥宗好德繇先世門內曾無害氣侵春鯉上盤琬白玉
夏蠶登箔鑄黃金兒長愷悌求書帙女大妖妍弄繡針
彼美堂名從此得固應長句為君吟

遣興

庸人往往慢吾曹汨沒空嗟命不遭死後欲留千載譽
生前須作萬人豪倦遊關塞身將老悵望雲天興漫高
却恨素無田二頃欲乘春雨藝東皋

用左轄郝公詩韻曹雲西居士

羨君祕學治玄玄黃老遺文有自傳不與宛駒爭萬里
漫隨遼鶴歎千年橫編每欲論今古中酒何勞問聖賢
甫里似聞杭稻熟舉家還泛五湖船

題胡伯衡飛雲圖

未應時命固相違千里遨遊久不歸已占龍頭承紫詔
更斬馬首賜朱衣塵沙客路牽愁遠泉石家鄉入夢稀
日夜思親心更切滄浪悵望白雲飛

元日早朝次韻辛良史

掖垣迢遞到城回
魏闕嵯峨此日開
赤芾會庭宵仗引
朱輪爭道曉鐘催
三泉忽報藏金甲
萬歲徒聞獻玉盃
樂奏象筭從此畢
小臣思見鳳凰來

歸至丹陽宿逆旅主人夢作燕子詩

燕子歸來意何當
羽毛初刷仍煌煌
孔鷹相望不我與
鷹隼有知那汝傷
晴雲淑郁鳴上下
春院芳華飛頡頏
莫言帝力遠微物
長發曾聞興彼商

送吳真人 二首

具嚴威命領祠官歷祀名山不厭難上帝乘龍遊下土
真人騎鶴降虛壇已刊白玉為封檢更鑄黃金作祭冠
國壽延洪千萬歲願祈穀熟小民安

又

子紹重黎有大功父宜封建至三公絲綸詔下皇恩重
黼黻衣成古禮崇視草乍聞辭玉府獻桃曾見到珠宮
有闕文便與彭錢得壽同

題貢氏秀野堂

貢氏諸郎皆好學南湖舊有讀書堂波濤已逐鯤鯨化
霧雨猶聞虎豹藏隴上麥禾春娓娓谷中杉桂曉蒼蒼
君卿雅有當時望八十能來佐漢皇

次韻張仲實除日聞鵲

奕世侯門能載德微如鳥鵲到今馴雕簷曉日鳴聲好
綠樹春風鼓翼頻雲漢有愁天欲近昆岡見抵俗難親
主人定有除書至貴爾先知及上春

吳山晚眺

山椒翬構四垂寬上相旌旗會覽觀傍近江湖天廣大
上連星斗地清寒龍宮永鎖函書閔鳳嶺重嗟苑樹殘
此際獨無雲蔽日正宜翹首望長安

次克明韻贈劉時中

循行郡國弗遲遲宣布新條及盛時民俗要令無徇盜
人才今喜得牛鑿窻間夜雨銷銀燭門外春雲壓彩旗
左右湖山都未覺好分餘力治文辭

潮

潮頭初起壯何如如阜如岡乍有無高浪駕天龍出沒
疾風吹樹鳥謹呼陰陽莫測機相軋朝夕初生信不渝
海石向來誇水德已應傾倒盡歸墟

次韻袁德平苦雨

二月雨霖無乃早園林誰復辨青紅浪花汨汨還登岸
雲葉翻翻久亂空水落巖崖通鳥道壑流榴翳塞龍宮
只今海上尤空濶願踏浮槎逐釣翁

遣興

門前高柳綠紛紛
戀靄留烟畫不分
雨砌芳菲晴後見
風窻言語靜中聞
桐花可作鳳凰食
竹葉還成虎豹文
但使此心無外慕
卜居何日絕人羣

雪

急靄中宵響瓦塍
寒光未曉入窻稜
橫飛朔野威風壯
盡壓西山氣槩增
蟻酒佐歡唯弟共
貂裘縱獵豈吾能
如今何處堪游目
葛嶺浮圖最一層

夏夜對月

暑天煩倦唯酣寢薄暮登樓起宿痾簟報新秋涼意早
窻開永夜月明多不眠孤鶴頻驚叫好事流螢屢見過
安得泛舟江海上坐觀冰鏡落滄波

送方仲永為重慶路校官

君有英才世罕徒矯然如鶴上天衢長懷道藝干明主
却恨衣冠累鉅儒愁裏論心相慰藉醉中發興共歌呼
此行萬里官西蜀有問長因竹使符

次韻劉時中見寄

泥塗霄漢固難謀亦有元龍百尺樓
籍籍圖書聊自適茫茫江海與誰遊
但聞燕市能求馬肯向秦川輒飯牛
富貴不才名盡滅未應摧沮恨淹留

遣懷

往歲銜杯意氣疎願隨童子誦詩書
久荒靖節松三徑獨守揚雄宅一區
春圃花殘收夏果海門潮落買江魚
如今也足成吾趣何事王門作曳裾

楊仲弘集卷七

欽定四庫全書

楊仲弘集卷八

元 楊載 撰

題高尚書竹石

矯龍疑蒼筠踞虎肖白石倘乘風雲會變化那可測

趙浚儀公竹石

老竹倚危石比德猶弟兄凌競度霜雪然後大節明

王晉卿古木

走根坼裂石曲榦漸清漣雷電忌交作化龍起重淵

墨蘭

謂香辭迫求曰色却媚愛執德非固然何用結為佩

墨蕙

與蘭大相似多花花蕊蕊在古象何人孤竹君二子

題松雪翁墨竹 二首

蘅蘭倚脩竹寂寞生幽谷比德如夷齊於此受命獨

又

側石狀奇峭橫竹枝扶疎猗蘭復叅立信哉德不孤

題墨竹四首為鄭尊師

飲霧初泠泠沐雨還旆旆相從來真遊可作晤語對

又

蔽日訝無影疏風疑有聲移根來室中尚假筆墨精

又

虛心可遊世直道難事人伯夷聖之清信哉德有隣

又

風味既澹泊顏色不斌媚孤生崖谷間有此凌雲氣

畫竹二首

翡翠含春霧琅玕振曉風清聲來枕上秀色入簾中

又

萌芽成虎豹變節作蛟龍正直唯吾與清修必子從

七言絕句

客中即事 五首

漸覺星星兩鬢皤推愁不去奈愁何客中忘却春光度
驚見前林嫩竹多

又

終朝矻矻坐書帷
春去春來總不知
怪得山禽如有意
隔窗撩亂踏花枝

又

幾日懸懸雨不休
客窗孤迥使人愁
杜鵑啼切知何處
坐對雲山萬木稠

又

美木千章遶故宮
如烟如霧塞虛空
路衝南北山岡斷

披拂能來萬里風

又

遠望潮頭出海來直衝西岸復東回
鷗夷萬古留深恨
如此波濤亦壯哉

悼隣妓

三首

西子湖邊楊柳花隨風飄泊到天涯
青春遇著歸來燕
銜入當年王謝家

又

金沙灘上觀音面
剗火光中幻化身
抱取摩尼却歸去
天衣元不污風塵

又

一種腰肢分外妍
雙眉畫作月娟娟
春風吹破襄王夢
行雨行雲若箇邊

種柳圖

連山斷岸古今同
彷彿柴桑入望中
為問江邊枯柳樹
飛花幾度亂春風

趙松雪畫蘭竹石

石上蘭苕已蔚然
竹枝相間復娟娟
正如王謝佳公子
文采風流竝世傳

謾題

都門幾度見秋風
楓柘連山樹樹紅
江海此時回首望
黃花滿地酒樽空

贈陳相士 二首

英豪無處覓知音
奔走塵埃嘆陸沈
他日預言當富貴

相逢何惜贈千金

又

江湖茫茫眼欲空尋常貴賤相多同
低頭強與時人語
踪跡徒勞逐轉蓬

棘林圖

村北村南隔暮雲滿林黃葉亂紛紛
楚江回首三千里
過鴈如今不可聞

沙鴈

漠漠寒烟樹影微一行沙鴈背人飛江南江北秋將盡
客子如今猶未歸

題應中父所藏陳仲美山水小景

層巒疊嶂倚晴空松檜相連秀色同下有幽人茆屋在
浩歌宜屬紫芝翁

扇上竹

種竹何須種萬竿一枝分影亦檀欒秋宵更受風披拂
聽取清聲入夢寒

題高尚書墨竹

尚書善畫名天下戲掃修篁筆更奇何異補陀巖石上
雪霜摧折有殘枝

聽琴圖

絲來六律妙難知聖德巍巍亦有師欲向琴中求至理
想從虞舜五絃推

讀碑圖

老瞞自負知無窮文藝兼求事事通獨忌楊侯才勝已

陷身令入網羅中

水仙花

花似金盃薦玉盤
炯然光照一庭寒
世間復有雲梯子
獻與嫦娥月裡看

題雪竹圖

飽經霜雪性堅強
拔起危梢百尺長
大節挺然難屈撓
渾如宋璟立班行

題風竹圖

屋後屋前皆種竹中宵無奈朔風號似維舟楫滄江上
裂岸崩崖聽怒濤

題息齋竹

老節巖巖若自持翛然分影覆堦墀此君不受纖塵污
更看清朝雨過時

雷泉

石崖深處有潛龍奮起春雷不見蹤自此白雲山下路
流泉一道響淙淙

次韻康子山舍人二首

兼旬風雨氣寒涼
院落幽深草木長
却喜今年多夏果
碧苞丹實滿林香

又

欲賞秋花色已涼
碧雲散盡楚天長
姮娥舊種無多樹
何故人間有此香

題鍾呂傳道圖

濟世曾聞有大才
超然脫屣去塵埃
劍光昱昱今何在

上下乘龍戲九垓

到京師

城雪初消蘆菜生角門深巷少人行
柳梢聽得黃鸝語
此是春來第一聲

送人二首

客路逢春雪乍消
眼前愁思轉相撩
垂楊染作黃金色
舞遍東風萬萬條

又

金溝河上始通流
海子橋邊繫客舟
却到江南春水漲
拍天波浪泛輕鷗

畫竹石 二首

竹前怪石起叅差
篁竹叢深使客疑
如過瀟湘江上路
鷓鴣啼罷日西時

又

息齋道人能畫竹
攬結造化歸毫端
偶從紙上得一箇
大勝渭川栽萬竿

宿浚儀公湖亭四首

夜宿湖亭水氣涼
四更風露濕衣裳
空濛霧重前山暗
屋角斜明是月光

又

兩兩三三白鳥飛
背人斜去落漁磯
雨餘不遣濃雲散
猶向前山擁翠微

又

幾年鄉夢隔江湖
此日登臨興不孤
小艇欲行無遠近

不愁歸醉要人扶

又

能文亦有張公子往歲俄加道士衣
載酒白雲山下路擬將臺翰與同揮

題十二紅卷子

碧桃枝上有珍禽調舌交交聽好音
畫出江南春意思明年攜酒共追尋

題巨然秋山

山色嵯峨樹老蒼
筆端描邈辨毫芒
從來名下無虛士
可與荆關作鴈行

題鄭子貞畫像二首

外姓爭權國必危
若人有道獨前知
倘緣辟召登朝著
恐見他年漢鼎移

又

躬耕谷口雜編民
寧肯懷金媚賊臣
楊子解言如許事
不知執戟是何人

次韻陳又新真人北上

驛騎翩翩祇覩歸壽觴捧罷戀慈闈秋風萬里關河道
回首那堪翔鴈飛

贈高如山

江行矚望多奇絕疊壁重崖翠倚空此日如山相邂逅
皓然秋鬢一衰翁

題畫兔呈馬伯庸學士

姮娥乞與長生藥自可騰空入月中竊食草間多利害

飢鷹奮擊待秋風

喜晴

樓外斜陽放晚晴
街衢前後聽歡聲
迴舟更倚南風順
千里青山照眼明

題廣寒龍先生詩卷

三首

匡廬山下有仙翁
壽與乾坤配始終
記得霓裳羽衣曲
此身曾入廣寒宮

又

人事休祥靡不知道高曾作帝王師龍顏大悅承天寵
長記麻衣上殿時

又

古來聞有列仙儒栖宿巖巖道味腴度世直須功行滿
乘龍飛去侍清都

題倪御史墨帖 二首

官府移文存大畧僧家常住守清規祇令坐奪齊人食
嘆息浮屠亦少哀

又

唐季朝銜亦漫加長憂群盜亂如麻子孫奕葉猶昌熾
知是當年積善家

紀夢 二首

四面青山擁翠微樓臺相向闢天扉夜闌每作遊仙夢
月滿瓊田萬鶴飛

又

紛紛鸞鶴滿虛空耳畔如聞度海風直上雲霄千萬里

此身飛入紫微宮

題溫日觀葡萄 二首

老禪嗜酒醉不醒
強坐虛欄寫清影
興來擲筆意茫然
落葉滿庭秋月冷

又

醉中捉筆兩眼花
倚簷架子歌復斜
翠藤盤屈那可辨
但見滿紙生龍蛇

題墨竹 二首

解谷陰寒石如鐵二龍僵立露骨節春雷動地萬物活
畏汝飛騰衝石裂

又

攢青聚綠生巖幽海濤聲引風颼颼年年三伏林下臥
白晝慄慄如深秋

用韻送德陽入越為贅壻

二首

從來浪迹信流槎始至山陰便作家不與淮王援桂樹
應隨越女採荷花

又

輕霞薄霧詰朝晴岸柳江梅著樹明更向若耶溪上聽
傍人歌唱盡春聲

次韻子正雪中雜興

四首

天宮何事又飛花欲以文章起作家坐想玉堂風味在
赤銅官鼎試春茶

又

舊說魯城玉為樹千樹萬樹遶仙家又須天上春風早

想見飄零如此花

又

姑射仙人玉佩裳周流天地有輝光但令穀熟不疵癘
未受人間黍稷香

又

寂寞寒儒半畝宮堆瓊積玉未為窮向來得此成奇觀
一任衡門動健風

題子行所藏魚藻圖

畫出條魚戲綠漪
羣分小白更相隨
主人真得蒙莊趣
視此洋洋樂可知

題宣和畫爵

二首

巖然徵命出蓬蒿
飛躍無踰數仞高
阿閣鳳皇行缺此
畫渠能使聖躬勞

又

一爵翩然飛且鳴
翎毛嘴爪若天成
遼陽一往無消息
猶得人間著畫名

次韻雪 三首

若有神人為散花往來揮灑任橫斜乘龍忽忽行天上
何不斯須過我家

又

初上衣裾細細花老松偃頰半枝斜高林窮谷無行徑
敗壁頽簷有住家

又

研光帽子舞山花吹落曾城萬仞斜安得飈輪為我駕

一時飛到列仙家

題曾氏墳山詩

漫漫平田一望中
前山突起勢穹崇
千年畱得孤墳在
祇為州人敬魯公

題三生圖

一生曾歷萬生多
貴賤賢愚變幾何
更向此身存業識
茫茫大劫詎消磨

雲林雨霽圖為瞿澤民賦

麗澤乘時灑八荒歸雲杉杪尚悠揚齊民亦有豐年望
豈但陳陳問太倉

山谷帖

古來君子重親親欣戚相於此意真再拜先賢遺墨在
弟兄鬪鬪是何人

趙承旨帖

書名世仰浚儀公望重朝廷品秩隆今日後生思做做
臨池須費十年功

陽關圖

咸陽西距玉門關萬里征人憚往還此別尊前須盡醉
相逢俱是鬢毛斑

春山圖

春山流水暗涓涓發歛朝雲與暮烟更茸奇峰千萬仞
不愁無處學神仙

集虛

虛室還能致吉祥唯嫌六鑿互相攘百神受命皆來舍

豈假乘雲入帝鄉

偶題 二首

巨木埋根數百年蔚然蒼翠上參天
不歸宮闕充梁棟也作龍舟濟大川

又

海上雲來徧地陰波間漏日瀉黃金
水車倦踏傷淫潦無奈連天雨正深

画枇杷

四月江南盧橘熟離離佳實滿枝黃丹青偶向圖中見
清蜜猶思配一觴

偶題

藏名匿迹黃塵中日抱書案心冥濛牆頭花變兩三色
又是一年看春風

清溪

霧擁春郊白晝昏清溪路斷客銷魂更憐把釣衝風雨
欲與漁翁共一樽

喜晴

簷外喧喧雀報晴
夕陽猶照小窗明
迴舟更倚南風順
要聽田家打麥聲


題沙總管屏風

驚濤奔衝山震動
靈液滲灑樹滋長
襲肌或怯寒吹搖
入耳如聞怒雷響

畫馬

天家狙校骨骼奇
朝飲暮秣必以時
世無造父能駕馭

直欲弄影舞瑤池



楊仲弘集卷八